

SENZA TITEL

da Martin Cantieni




Punts 178, 06-2009, p. 18

Els planiseschan, preparan, organischeschan, quintan, controlleschan, curregian, formuleschan pli fin, in zic meglier, in zic auter, anc in pau meglier, suttastritgan anc ina giada ils avantatgs, accentueschan las sinergias, miran da betg offender quel e betg dischillusiunar l'otra, betg direct cuntradir a l'auter – perquai ch'ins na sa mai – els studegian e sa storschan ch'ils chaus fiman ed ils maguns sa volvan per projects e skizzas e propostas e concurrenzas per objects che vegnan mai realisads, concurrenzas che vegnan mai gudagnadas e propostas che vegnan mai acceptadas. Persuenter vegn l'entir process documentà, registrà, surveglià, analisà e reflectà, i vegn fatg propostas e formulà ideas co augmentar l'effizienz, simplifitgar la metoda, auzar l'acceptanza, nizzegiar las sinergias, vegnir a frida cun damain resursas la proxima giada ch'i vegn planisà, proponì, organisà e calculà in project che vegn mai realisà.

E lura in di, curt avant la clinica, il burn-out, il knock-out, l'overkill u l'amoc – naging avess spetgà – tut surura la victoria, in pitschen pass sin la lunga via a l'utopia, la finamira en mira, in mument decisiv, la midada da la tendenza, la situaziun win-win gia quasi cuntanschida – tge satisfacziun!

E quai dat la forza per anc ina giada reveder, curreger, concretisar ed anc ina giada empruvar. Ma uschè simpel sco pensà n'èsi betg stà, la victoria era be ina pitschna, l'euforia passada, la lavur restada, la difficultad s'augmentada, ed in factur betg spetgà è sa mussà. Surchargiads e profundamain frustrads da tanta ingiustia e nauschadad, da questa stinadadad nà da tschella vart, da surengiu (sch'i vegn chajà, adina da là), ston els, senza badar, cun chaminar in zic pli envi (darar vai ensi), passar a quels sut sin il chau.



«La crisa survegn jeu, sch'jeu hai memia bia lavur e memia pauc temps per memez.»

(Marc, 18, student)